

A Ciampedel....We "batolon" in English!

Te Coprativa de Ciampedel l'é stat endrezà n cors de ingleis per dependents. L'obietif l'é miorèr la calità de la perferida de dut l païsc



Ciampedel - La eude vedù ence voetres i striscion sun barcon de la Coprativa de Ciampedel? L'é scrit "We batolon in English!" e l'é n simbol per fér entener che te chela coprativa se rejona ingleis.

L'idea é nasciuda te Coprativa de Ciampedel olache via per i meisc passé l'é stat pissà de meter a jir n cors de ingleis.

Il diretor Andrea Frigo defat l'à vedù che l'era l besegn de smaorèr la cognoscenza de l'ingleis per miorèr la perferida del servije de la Coprativa che la raprejenta n pont de referiment per la païsc: tant per residents che turisc.

Il cors l'é scomenzà i prumes de otobre e l'é jit inant per dut l meis per trei outes en setemèna.

L'ensegnanta l'é la fascèna Sara Riz

de la firma de marketing e comunicazion "Only Light". Ela ne à contà delvers coche l'é stat endrezà l cors, i resultac otegnui e ence la scomenzadives che vegrà metudes a jir de chest vers.

"Con la Coprativa de Ciampedel – disc Sara Riz - aon endrezà ensemble n cors de ingleis spezifich per dependents per ge sporjer n servije mior ai ghesc' foresc'. Se à vedù che l'era situazions olache no se era bogn de se entener. Sion ponté demez duc ensemble: l'era duc i dependents, l diretor e l president (en dut 15), donca personnes dai 30 ai 60 e anter chisc l'era chi che no saea nia e chi che enveze saea mìngol de più.

Aon tacà sobito e no aon fat lezioni de gramatica, ma lezioni prateghes. L'é stat trei scontrèdes per setemèna:

de lunesc l'era la scontrèda de lengaz generèl per emparèr i saluc e la indicazions de basa; la seconda di se jia de persona te repart e se faje na faussa scena/na simulazion e la terza di se lurèa sul lengaz spezifich e donca vocaboi e dialogs per vigni partiment.

Sion rué a n pont olache se é bogn de saludèr e ge dèr azet al forest, responder a sia domanes, ge moscèr olache l'é la roba e saer i vocaboi.

Sion ponté demez duc n muie engaisse – à dit semper Sara Riz - il cors l'é stat fat con n obietif emportant: saer rejonèr ence mìngol per ingleis vel dir dèr n servije mior a la coprativa, e ence per la comunanza, percheche a la fin duc passa te coprativa".

Per uzèr fora chesta scomenzadiva de calità l'é stat pissà ence de la comunichèr tras n striscion con su na batola e la scrita "We batolon in English" (Nos ciacolon per ingleis). La batola (te chest cajo con i colores de la bandiera ingleisa) la é stata touta percheche l'é mìngol l simbol del païsc de Ciampedel e percheche "batolèr" per fascian vel dir ence ciacolèr.

Apède a chest, semper per slarièr fora la scomenzadiva, vegrà metù n simbol su la maietes di dependents e via per de november (fosc la seconda setemèna del meis) vegrà dat n pìcol omaje a duc chi che ge rejonrà per ingleis ai dependets de la Coprativa de Ciampedel e i li didarà coscita a se tegnir alené con l'ingleis per la sajon da d'invern. (vr)

L cors va amò inant ajache i resultac é bogn e se pel miorer semper de più!

Develpai a la [Usc di Ladins](#) e a Valentina Redolfi!